

आकाशवाणी

- विदेश मंत्री एस. जयशंकर होरें अज्ज नमीं दिल्ली च अपनी नेपाली हमरूतबा आरजू राणा देउबा हुंदे नै गल्लबात कीती ते दौनें मुखें बक्ख-बक्ख क्षेत्रें च बेहतर सरबंधें बारै चर्चा कीती।
- केंद्री खजाना मंत्री निर्मला सीतारमण होरें सार्वजनिक क्षेत्र दे बैंकें दी कारकरदगी दा जायजा लैता।
- नमिएं काहडें ते नवाचार गी बढ़ावा देने सरबन्धी भारत आस्ट्रेलिया, RICE नै जलवायु ते राईबाई दे क्षेत्र च चुनौतिएं दा मकाबला करने लेई स्टार्ट अप्स ते MSME बक्खी ध्यान देने पर जोर दित्ता।
- 15 ग्लोबल साउथ मुखें थमां सेहत क्षेत्र दे नीति निर्धारक ते माहिर 4 दिनें दे भारत दौरे पर।
- सूचना ते प्रसारण राज्यमंत्री डॉ. एल मुरुगण होरें आखेआ ऐ जे समाज दी सेवा करा रदे डाक्टरें गी सुरक्षा प्रदान करना राज्य सरकारें दी जिम्मेदारी बनदी ऐ।

<><><><><><>

Nepal-Foreign Minister

विदेश मंत्री डॉ. एस जयशंकर होरें अज्ज नमीं दिल्ली च नेपाल दिएं विदेश मंत्री आरजू राणा देउबा हुंदे नै मलाटी कीती। बैठक दौरान दौनें नेताएं उर्जा, बपार, संपर्क ते बुनियादी ढांचे दे विकास दे क्षेत्र समेत बक्ख-बक्ख क्षेत्रें च दक्खी सहयोग पर चर्चा कीती। अपनी इक सोशल मीडिया पोस्ट पर डॉ. जयशंकर होरें इस गल्लै पर खुशी प्रगट कीती जे नेपाल भारत गी इक ज्हार मेगावाट बिजली निर्यात करोग। जयशंकर होरें आखेआ जे भारत “गोआंडी पैहलें, आहली नीति ते लोकें बश्कार बेमिसाल सांस्कृतिक जुड़ाव आहले सरबन्धें गी अगड़े बधांदा ऐ। नेपाली विदेश मंत्री कल भारत दे 5 रोजा दौरे पर नमीं दिल्ली पुजियां हियां।

<><><><><><>

Sitharaman-Review Meet

केंद्री खजाना मंत्री निर्मला सीतारमण होरें अज्ज नमीं दिल्ली च इक बैठक च सार्वजनिक क्षेत्र दे बैंकें दे दी कारकरदगी दा जायजा लैता। बैठका च सार्वजनिक क्षेत्र दे बैंक दे चीफ एग्जीक्यूटिव अफसर, प्रबंध निदेशक, खजाना सेवाएं दे विभाग दे सचिव डॉ. विवेक जोशी ते होरनें अफसर शामिल हे। बैठका दौरान सुश्री सीतारमण होरें जमा वृद्धि दोआर शां जमा अनुपात ते संपत्ति सरबन्धी म्यार जेड़ी जे बैंक सरबन्धी हालात गी दर्शादे न। खजाना मंत्री होरें सरकारी पैहलें, जियां जे पीएम आवास योजना, पी.एम सूर्या घर ते पी.एम विश्वकर्मा योजना जनेई पैहल तैहत सार्वजनिक क्षेत्र दे बैंकें दी कारकरदगी दा जायजा लैता। एह सुश्री सीतारमण हुंदी बैंकें कन्नै मोदी सरकार दी त्री बारी सरकार बनने दे बाद खजाना मंत्री दे तौरा पर पैहलकी जायजा बैठक ही। बाद च खजाना मंत्री होर मकामी ग्रामीण बैंकें दे प्रदर्शन दा बी जायजा लैगन।

<><><><><><>

CBI-WB

केंद्री जांच ब्यूरो नै अज्ज उप्परोतली चौथे रोज बी आरजी कर मेडिकल कालेज दे साबका पिंर्सीपल संदीप घोष कोला पुच्छ-गिच्छ कीती। विपक्ष दे नेता सुवेंधु अधिकारी होरें दोष लाया ऐ जे पच्छिम बंगाल ते देश दे होरनें केई हिस्सें च लोकें गी भारतीय नागरिक सुरक्षा संहिता तैहत नोटिस जारी कीते जारदे न। उनें आखेआ जे उनेंगी कनूनी सहायता प्रदान कीती जागा।

<><><><><><>

Kolkata-Police

डॉ. कुणाल सरकार ते डॉ. सुबरना गोस्वामी अज्ज कोलकाता पुलिस मुख्यालय च पुज्जे। उनेंगी राधा गोविंद कर मामले च सोशल मीडिया पर गलत जानकारी फैलाने दे बारै च पुच्छ-गिच्छ लेई सद्देया गेदा हा। दौनें डाक्टरें कन्नै बड़ी बद् गिनतरी च उंदे सहयोगी बी उंदे कन्नै पुलिस मुख्यालय च पुज्जे।

<><><><><><>

Nurse Protest West Bengal

कोलकाता च कालेज ऑफ मेडिसिन ते सगोरे दत्ता मेडिकल कालेज ते अस्पताल दिएं नसें अज्ज आरजी कर मेडिकल कालेज च पेश आई दी इक महिला डाक्टर कन्नै दुष्कर्म ते हत्या आहली घटना दी पीड़िता लेई न्याय दी मंग करदे होई इक रैली च हिस्सा लैता। इनें नसें अस्पताल परिसर च गै विरोध प्रदर्शन कीता। इस मौके विरोध करा'रदे जूनियर डाक्टरें बी प्रदर्शन च नसें दा साथ दित्ता।

<><><><><><>

AIM-RISE

भारत ते आस्ट्रेलिया नै स्टार्ट अप्स गी बढावा देने लेई इक महत्वपूर्ण गैं पुट्टदे होई किट्टे रलिए दौनें मुखें दे स्टार्ट अप्स ते एमएसएमई-एं कोलां दरखास्तां मंगियां न। एह कार्यक्रम टकोहदे तौरा पर करसानें दिएं जरूरतें, तरजीएं ते राईबाई दी बवस्था च लोडचदे सुधारात्मक नबेडे कन्नै सरबन्धित लौहके, दरम्याने ते भलेयां लौहके उद्यमें ते स्टार्ट अप्स लेई ऐ। दरखास्तां जमा कराने लेई खीरी तरीक 15 सितंबर रक्खी गेदी ऐ।

<><><><><><>

Health-Policy

ग्लोबल साउथ समूह दे 15 बक्ख-बक्ख मुखें थमां सेहत क्षेत्र दे 30 नीति निर्धारक ते माहिर अज्जे थमां 4 दिनें दे भारत दौरे पर न। इस दौरे दा सरिस्ता विदेश मंत्रालय आस्सेया कीता गेदा ऐ जदे च सेहत मंत्रालय ते भारतीय फार्माकोपोइया आयोग बी सहयोग देआ रदा ऐ। अज्ज पैहले रोज केंद्री सेहत मंत्री जगत प्रकाश नड्डा होरें कार्यक्रम दा उद्घाटन कीता जेदे च एह माहिर ते नीति निर्धारक अपने भारतीय हमरूतबाएं कन्नै सलाह सूत्र करा रदे न। होरनें महत्वपूर्ण बैठकें दे अलावा इनें माहिरें गी जन औषधि केंद्र दस्सने ते दोआइयां ते टीके तैयार करने आले केंद्र दस्सने लेई आगरा ते हैदराबाद बी लेता जागा।

<><><><><><>

केंद्रीय सूचना ते प्रसारण राज्यमंत्री डॉ. एल मुरुगन होरें आखेआ ऐ जे समाज दी सेवा करा रदे डाक्टरें दी सुरक्षा राज्य सरकार दी जिम्मेदारी बनदी ऐ। अज्ज आकाशवाणी चिन्नेई च पत्रकारें कन्ने गल्ल करदे होई डॉ. मुरुगन होरें आखेआ जे 2047 च भारत इक महाशक्ति बनी गेदा होग ते सरकार इस दिशा च अपने जत्त बरोबर जारी रक्खे दी ऐ। मंत्री होरें द्रविड़ मुनेत्र कडगम डीएमके दी अगुवाई आली राज्य सरकार केंद्र सरकार दे कार्यक्रमे गी अपना दस्सिये पेश करा रदी ऐ। उनें आखेआ जे केंद्र नै 8 ज्हार करोड़ रपे जारी करी दित्ते देन पर डभ्एमके केंद्र पर फंड जारी नेई करने दा आरोप ला करदी ऐ। कल यादगारी टिकटां जारी करने आले समारोह दा जिक्र करदे होई मंत्री होरें आखेआ जे इस समारोह च रक्षा मंत्री राजनाथ सिंह होरें केंद्र सरकार दी तरफा शामिल होए हे ते एहू कोई सियासी कार्यक्रम नेई हा। मंत्री होरें सब्बनें मीडिया युनिटें दी कारकरदगी दा बी जायजा लैता। इस मौके पीआईबी दे क्षेत्रीय अध्यक्ष, केंद्रीय संचार ब्यूरो, केंद्रीय फिल्म प्रमाणन बोर्ड, पब्लिकेशन डिविजन, आकाशवाणी ते दूरदर्शन दे प्रतिनिधि बी मजूद हे जेड़ा तमिलनाडू, आंध्र प्रदेश, कर्नाटक, केरल, तेलंगाना ते पुदुचेरी थमां आए दे हे।

< > < > < > < > < > < >

सुप्रीम कोर्ट कल मंगलवारें भारत राश्ट्र समिति बी.आर.एस. दी नेता के. कविता हुंदे आस्सेया दायर अर्जी पर सुनवाई करोग। एहू याचिका कथित दिल्ली शराब नीति घोटाले कन्नै जुडी दी गुज्जखोरी ते पैहे दे गैर कनूनी लैन-देन आले मामले च दायर कीती गेदी ऐ। पिछले हफ्ते सुप्रीम कोर्ट नै के कविता दी याचिका दी जांच करने पर अपनी रजामंदी जाहर कीती ते सीबीआई ते ई.डी गी अपना जवाब दाखल करने लेई आखेआ। अदालतै जांच एजेंसिएं दा पक्ख सुनने बिजन अंतरिम राहत देने सवां इंकार करी दित्ता। बीआरएस प्रमुख ते तेलंगाना दे साबका मुखमंत्री के. चंद्रशेखर राव हुंदी धीहू के. कविता गी दिल्ली हाई कोर्ट नै पिछली पैहली जुलाई गी जमानत देने सवां नां करी दित्ती ही।

<><><><><><>

कांग्रेस पार्टी दे सीनियर लीडर अभिषेक मनु सिंघवी होरें अज्ज तेलंगाना थमां राज्यसभा उप चुनां लेई अपना नामांकन दाखल कीता ऐ। इस मौके पार्टी दे राज्य प्रधान आर. रेवंत रेड्डी ते पार्टी दे होर केई लीडर बी उंदे कन्ने आए दे हे।

<> <> <> <> <> <>

जिम्बाब्वे दे उपराश्ट्रपति कान्स्टैनटिनो गुवेया डामनिक निकाड जीनो अज्ज नमीं दिल्ली पुज्जे ना। ओहू कल 19मीं सी.आई.आई भारत-अफ्रीका बपार सम्मेलन च हिस्सा लैंगन। विदेश मंत्रालय दे प्रवक्ता रणधीर जैसवाल होरें इक सोशल मीडिया पोस्ट च आखेआ ऐ जे एह सम्मेलन भारत ते जिम्बाब्वे बश्कार मजबूत रिश्ते गी दर्शादा ऐ।

<><><><><><>

PM-Bkiram Kishore

प्रधानमंत्री नरेंद्र मोदी होंरें अज्ज महाराजा बीर बिक्रम किशोर मानिक्य बहादुर हुंदी जनम जयंती दे मौके पर उनेंगी श्रद्धांजलि भेंट कीती। अपने इक सोशल मीडिया संदेश च प्रधानमंत्री होर त्रिपुरा दे विकास च उंदे टकोहदे योगदान गी उजागर कीता।

<><><><><><>

PM-Sanskrit Day

विश्व 'संस्कृत दिवस' दे मौके पर प्रधानमंत्री नरेंद्र मोदी होंरें सब्बनें टकोहदा करिए संस्कृत बोलने जा इसदा इस्तेमाल करने आलें गी ममारकबाद दिती ऐ।

<><><><><><>

Prez. Shankar Dyal

राष्ट्रपति द्रौपदी मुर्मू होंरें अज्ज राष्ट्रपति भवन च साबका राष्ट्रपति डॉ. शंकर दयाल शर्मा जी गी उंदी जयंती उपपर शरधांजलि अर्पित कीती। राष्ट्रपति भवन दे अधिकारियें बी डॉ. शंकर दयाल शर्मा हुंदे फोटू पर फुल्ल चढ़ाइयै शरधांजलि अर्पित कीती।

<><><><><><>

EX-Army Chief

साबका सेना प्रमुख जनरल सुंदरराजन पदमनाभम हुंदा अज्ज चेन्नई च अपने घर काल होई गेआ। ओहू 83एं बरें दे हे। एहू 20में चीफ ऑफ आर्मी स्टाफ हे। इंदा जन्म 5 दिसंबर 1940 गी केरल दे त्रिवेंद्रम च होआ हा। एहू प्रतिष्ठित राष्ट्री इंडियन मिलिटरी कालेज देहरादून ते नेशनल डिफेंस अकैडमी, Khadakwasla Pune दे साबका छात्र हे। 13 दिसंबर 1959 गी इंडियन मिलिटरी अकैडमी थमां स्नातक होने दे बाद उनेंगी तोपखाना दी रेजीमेंट च कमशन कीता गेआ।

<><><><><><>

Attack

जम्मू-कश्मीर दे उधमपुर जिले च सीआरपीएफ दी इक गश्ती टीम पर कीते गेदे हमले च इक्क इंस्पेक्टर शहीद होई गेआ ऐ। स्हाड़े संवाददाता नै जानकारी दिती ऐ जे जिले दे रामनगर इलाके च चील थार आतंकवादिगं गश्ती टीम पर घात लाइये हमला कीता। होर ब्यौरे गी बलगेया जा'रदा ऐ।

<><><><><><>

Election-Notification

जम्मू-कश्मीर च 2024 दे विधानसभा दे पैहले चरण दे आम चुनावं दी अधिसूचना कल जारी कीती जाग। आकाशवाणी जम्मू दे संवाददाता दी रिपोर्ट मुजब अनंतनाग, शोपियां, कुलगाम, रामबन, किश्तवाड़ ते डोडा जिलें दे 24 विधानसभा क्षेत्रें च पैहले चरण दे तैहत नामांकन दाखल कराने दी खीरी तरीक 27 अगस्त तैह कीती गई ऐ। ओहदे मगरा ध्याड़े नामजदगी दी जांच कीती जाग। नामांकन वापस लैने दी खीरी तरीक 30 अगस्त 2024 तैय कीती गई ऐ ते मतदान 18 सितंबर गी होग। इस थमां पैहले हदबंदी दे विधानसभा क्षेत्रें दी गिनतरी 90 करी दिती गई ऐ ते चुनावं त्रै चरणें च इनें 24, 26 ते 40 विधानसभा क्षेत्रें च 18 सितंबर, 25 सितंबर ते 1 अक्तूबर की होंगन ते वोटें दी गिनतरी 4 अक्तूबर गी होग ते उसै दिन नतीजे औने दी बी मेद ऐ। सुप्रीम कोर्ट नै पिछले बरे दिसंबर च अनुच्छेद 370 दे प्रावधानें बारै

अपने फैसले च 30 सितंबर 2024 तक्कर जम्मू-कश्मीर च विधानसभा चुनां करोआने दे निर्देश दित्ते हे। केंद्र शासित प्रदेश जम्मू-कश्मीर च औने आहले विधानसभा चुनाएं लेई खीरी मतदाताएं दी गिनतरी आहली सूची यानि इलेक्टरोल रोल कल जारी कीते जाने दी मेद ऐ जिंदे च मतदाताएं दी गिनतरी 90 लक्ख दे करीब होने दी मेद ऐ। इलाके ते मतदाताएं दी गिनतरी आहली एह सूची इस बारी बड़ी मती महत्व आहली होग कीजे हदबंदी दी कवायद दे मगरा मते सारे विधानसभा क्षेत्रों दी सीमाएं च बदलाव कीता गेआ ऐ ते विधानसभा सीटें दी गिनतरी बी 83 थमां 90 होई गेई ऐ। तकरीबन 2 मिलियन मतदाताएं शां करीब 21 लक्ख मतदाता युवा न ते 20 थमां 29 बरें दी बरेसू दे बश्कार न। जम्मू-कश्मीर दियें 90 विधानसभा सीटें शां 74 सीटां जनरल, 7 अनुसूचित जाति दे मेदवारें लेई ते 9 अनुसूचित जनजाति दे मेदवारें लेई आरक्षित न।

<><><><><><>

BJP-Candidate

जम्मू-कश्मीर च होने आहले विधानसभा चुनाएं थमां पैहले केंद्री मंत्री ते तेलंगाना भाजपा अध्यक्ष जी किशन रेड्डी होरें अज्ज आखेआ ऐ जे पार्टी दे राश्ट्री अध्यक्ष ते केंद्री मंत्री जे.पी नड्डा हुंदी अगुवाई च मेदवारें दे नाएं गी तौलें गै खीरी रूप दित्ता जाग। पार्टी दफ्तर च भाजपा चुनांस कमेटी दी बैठक उप्पर श्री रेड्डी होरें आखेआ जे मेदवारें बारै खीरी फैसला राश्ट्री चुनांस कमेटी दा होग। राज्यें दी चुनांस कमेटी नाएं दी सफारश करग फिर उस थमां अस पैनल दी सफारश करगे। अखीर च भाजपा दे राश्ट्री अध्यक्ष ते केंद्री मंत्री जे.पी.नड्डा दी अगुवाई च मेदवारें दे नां फाइनल कीते जांगन। उनें आखेआ जे नामांकन दी खीरी तरीक 27 अगस्त ऐ, इस करी एहदी घोषणा इस हफ्ते गै कीती जाग। उनें एह बी आखेआ जे पार्टी दा मुख मकसद जम्मू-कश्मीर गी आतंकवाद, भाई-भतीजावाद थमां बचाना ऐ ते एहदे आस्तै पार्टी इक जुट होइयै कम्म करा'रदी ऐ। जम्मू-कश्मीर थमां अनुच्छेद 370 दे रद्द होने दे बाद इत्थें भाईचरा ते शांति दा माहौल कायम ऐ। वोटें दी गिनतरी 4 अक्तूबर गी होग ते एह चुनांस 370 रद्द होने दे बाद जम्मू-कश्मीर च पैहला चुनांस ऐ।

<><><><><><>